

REGIONAL NEWS

HEADLINES:-

1. Aizawl leh Silchar inkar kawngpui, Mizoram chaklakna kawngpui ber a chhiat lutuk avanga lirthei tangkhang mek 826 te chu nizan khan chhuah a ni.
2. Raltlante kutzia leh mit-naute lakkhawm hna Mizoram district 11-a kalpui mekah Zirtawpni tlai thleng khan Myanmar raltlan 1,947 biometric enrolment tih tawh a ni.
3. Mizorama lung in hrang hrang zingah Central Jail leh Central Women Jail bakah district jail pathumah tang awm thei zat tura ruahman aia tam an tang mek.
4. Prime Minister Narendra Modi-a'n Bengaluru atangin Vande Bharat rel service thar 3 a vai liam.

<><><>

VEHICLE MOVEMENT

Aizawl leh Silchar inkar kawngpui, Mizoram chaklakna kawngpui ber a chhiat lutuk avanga lirthei tangkhang mek 826 te chu nizan khan chhuah a ni.

Sorkar hotute hnen atanga thu dawn danin tukin zing dar 8 thleng khan Kawnpui atangin Aizawl lam pan lirthei 603 chhuah a ni a. An chhuah zingah hian eirawngbawl na gas phur 25 leh tuialhthei phur 62 a tel a. Tuialhthei phur zingah hian petrol phur 29, diesel phur 27, phurh pawlh 5 leh thlawhtheihna hman tur tuialhthei phur 1 a tel a ni. Kolasib leh Assam lam pan Sairang peng leh Khamrang leh Mualkhang atangin lirthei 223 chhuah a ni baw k a. Chhuah zawng zawng hi lirthei 826 a ni. Lirthei tangkhang hi a tlem tawh hle a. Aizawl lam pan tur 31 leh Assam lam pan tur 5, a vaiin 36 chhuah loh a la awm a ni.

He tih lai hian Sairang/Buichali leh Kawnpui inkar kawng chhe zualpui chu siamthat thawkhat tawh niin sorkar lam chuan a sawi na-in sumdawng lirthei neitu leh khalhtu pawlte chuan hun rei a daih loh an hlauhthawn thu an sawi a. Kawngpui siamna atana an lung hman thenkhat chu a chang taw k lo ni a sawi an awm baw k. Lirthei tam tham tak chhuah a ni tawh chungin Aizawl khawpui-ah chuan mipui nitin mamawh engemawzat chu a la vang hle a, chu'ng zingah chuan Amul company leh company dang siam bawngnhute a vang zual a. Insakna bungraw zingah cement lei tur a la awm meuh lo ni a thudawn a ni baw k.

<><><>

ROAD BLOCK

Mizoram chhim lam kalpawhna kawngpui pawimawh tak, Lunglei district Bualte leh Thualthu inkara leimin avanga ping chu vawiina thenfai a nih laia a min belh leh avangin thenfai zawh theih a la ni lo. Lunglei SP Pu J. Lalmuankima chuan Akashvani Aizawl zawhna chhangin leimin chu thenfai hna thawh mek a nih thu leh Thualthu lam zawkah thenfai tur a la tam thu a sawi a. Lirthei kaltlang theiha an thenfai theih hun tur a la hriat loh thu sawiin vawiina an zawh hman leh hman loh tur chu khaw awm dan azirin a hriat theih chauh tur thu a sawi a ni. Bualte khua atanga thudawn danin leimin hi thenfai a nih lai-in vawiin chawhnu khan kawng chhak lam atangin a min leh a. Tuna leimin an

paih fai mek chu thenfai pawh ni se, a chhak lamah tawlh zui tur a la awm leh avangin vawiin khaw en lai chuan an zawh hman an rin loh thu an sawi a ni.

Lawngtlai West bialtu MLA Pu C. Ngunlianchunga chuan Mizoram chhim lam Lawngtlai leh Siaha district kalpawhna kawngpui pawimawh tak a pin avanga khualzin tangkhangte Bualte leh Thualthu khawtlangin an lo buaipui avangin lawmthu a sawi a. Bualte leh Thualthu Branch YMA hnenah Lawngtlai West MLA chuan Rs. 5,000 ve ve a pe a ni. Vawiin khan BCM hmunpui R&D pawhin khualzin tangkhang te ei tur lei na'n Bualte khawtlang hruaitu te kutah Rs 20,000 an hlan ve leh a ni. Chaw ei na'n hian dispo thleng an hmang a, an hman hnu hi an eirawngbawlina Hall hnung khamah an paih liam leh mai thin a ni.

<><><>

I-DAY INVITATION

India President-in kumin Independence lawmna neih tura President at home a tel tura a sawm bik mi 150 zinga mi, Pachhunga University College zirlai, Grace Lalrinpari Hauzel chuan sawmna ropui tak a dawn avangin lawmawm a tih thu Akashvani a hrilh.

Grace Lalrinpari Hauzel chuan India ram mi vaibelchhe tel awmnaa mi 150 thlan chhuah bika a tel thei chu vanneihthlak a tih thu a sawi a ni.

President-in Grace Lalrinpari Hauzel a sawmna hi Zirtawpni khan India Post Office Aizawl chuan a chenna in Khatlaah an hlan a. Ni Grace Lalrinpari Hauzel hi kumin January thla khan Viksit Bharata Young Leaders Dialogue 2025, New Delhi-a neihah Youth representative of India thlan zingah a tel tawh a, Mizoram district 11 atanga State level National Youth Parliament 2024 intihsiakah lawmman pakhatna ala tawh bawk. Heng bakah hian chawimawina hrang hrang a dawng tawh bawk a ni.

<><><>

BIOMETRIC ENROLMENT

Raltlante kutzia leh mit-naute lakkhawm hna Mizoram district 11-a kalpui mekah Zirtawpni tlai thleng khan Myanmar raltlan 1,947 biometric enrolment tih tawh a ni.

Home department hotute sawi danin Myanmar raltlan sing 32,000 chuang leh Bangladesh raltlan 3,000 tling lo deuhthe mit-naute leh kutze lakkhawm hna hi July ni 28 a bul tan an awm laiin a nawlpui chuan July ni 30 leh 31-ah an tan a, July thla tawp lamah bul an tan hman vek a ni. Hetihlai hian district hrang hranga he hna thawktute hian harsatna an tawk a. A bikin biometric enrolment hnathawhna electronic khawl hman hleih theih loh a awm nual bakah internet signal that tawk lohna hmunah harsatna an tawk bawk ani. Relief camp-a a huhova awmte mit-naute leh kutze thla lak a awlsam viau lai-in an fate Aizawl leh district danga lehkhazir mekte an awm avangin lak kim vek hleih theih loh a awm a. An chhungte leh thiante belte leh mi inluahte chu an awmna hmun a inkar-kik avangin hna a kal chak thei lo bawk a ni.

Myanmar raltlan awm tam berna Champhai district-ah mi 13,500 chuang an awma ngaih a ni a. Chuti chung chuan Champhai district official-te electronic khawl hman chu a fuh theih loh avangin nimin (Inrinni) khan Aizawl atangin khawl thar an la leh a. Tun kar chho hi chuan an thawk tluang thei tura an inngaih thu an sawi a. July ni 31 atang khan an hna tan tawh mah se, mi 7 chauh biometric enrolment an la ti thei a ni.

Myanmar raltlante hi district 11-a an awm lai-in Bangladesh Chittagong Hill Tract atanga raltlante chu district pathumah chauh an awm a. Lawngtlai district-ah mi 2,000 chuang an awm a, Thenzawl khawpui-ah 266 awmin Lunglei district a Khawmawi khua-ah 63 an awm bawka ni.

<><><>

ANTI DRUG CAMPAIGN

Mizoram Presbyterian Kohhran thalai pawl, KTP in thla hmasa ni 1 atanga Ruihhlo Do beihpui, Street Ministry an kalpui mek chu tun thla tir khan an kal dan tidanglam hlekin an kalpui chhunzawm zel.

Central KTP hnuaia Ruihhlo Do Committee Secretary Pu David Lalruatfela chuan Akashvani Aizawl zawhna chhangin Central KTP Ruihhlo Do Street Ministry chu July thla tir atang khan Zirtawpni zan apiangin Aizawl khawpui chhunga hmun thlanchhuah 14-ah Branch KTP hrang hrang ten an kalpui thin thu leh, khawpui pawn Mizoram khaw hrang hrangah chuan an remchan angin hmun thlan bik awm loin an kalpui thin thu a sawi a. Ruihhlo ngai te hnenah ei leh inte semin a remchan angin cousselling te pein hun an hmang thin tih a sawi.

Pu David Lalruatfela chuan Branch KTP kalchhuak thinte thil tawn thlirin hmun thlanchhuah sa 14 zinga hmun 7 chu ruihhlo ngai hmuh tur an awm loh avangin Central KTP Committee chuan tun thla tira an thutkhawmah an paih tih a sawi a. Tunah hian hmun 17 thlan chhuah bikah te Zirtawpni zan apiangin branch KTP te an thawkchhuak thin tih sawiin September thla atang chuan kar khatah tum hnih, Thawhlejni leh Zirtawpni zanah te ngawrh taka kalpui chhunzawm an tum tih a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PRISONS

Mizorاما lung in hrang hrang zingah Central Jail leh Central Women Jail bakah district jail pathumah te tang awm thei zat tura ruahman aia tam an tang mek.

Prisons department atanga Akashvani Aizawl thudawn danin Mizoram chhunga sorkar lungin hrang hrangah tang awm thei zat chu mi 1,496 a nih laiin Zirtawpni kalta thlenga report-ah chuan mi 1,928 an tang mek a. Hei hi Central Jail leh Central Women Jail bakah Aizawl, Lunglei leh Champhai District Jail-ah te tang awm thei zat tura ruahman aia tam fe an tan vang a ni. Lungin tang tamna ber Central Jail-ah chuan tang thei zat tura ruahman mi 480 an nih laiin mi 923 an tang mek a, tang thei zat tura ruahman aiin mi 443 in an tam a. Central Women Jail-ah chuan mi 96 leng tura ruahman a nih laiin mi 145 leh an nu te'n an hruai naupang 8 an tang mek a, a awm thei zat tur aiin mi 57 in an tam a ni.

<><><>